

Orde do 17 de abril de 2023 pola que se convocan subvencións para a modernización de empresas privadas de transporte de viaxeiros prestadoras de servizos de transporte por estrada e de empresas privadas que interveñen no transporte de mercadorías por estrada, na Comunidade Autónoma de Galicia, no marco do Plan de Recuperación, Transformación e Resiliencia- Financiado pola Unión Europea- Next Generation EU, xestionado polo Ministerio de Transportes, Mobilidade e Axenda Urbana para os anos 2023 e 2024 (códigos de procedemento IF325A, IF325B, IF325C, IF325D, IF325E, IF325F, IF325G, IF325H, IF325I e IF325J)

O Real decreto 902/2022, de 25 de outubro, aprobou a concesión directa de axudas ás comunidades autónomas e ás cidades de Ceuta e Melilla para a modernización de empresas privadas de transporte de viaxeiros prestadoras de servizos de transporte por estrada e de empresas privadas que interveñen no transporte de mercadorías por estrada, no marco do Plan de Recuperación, Transformación e Resiliencia -Financiado pola Unión Europea- Next Generation EU, e establece as normas especiais de estas subvencións, co carácter de bases reguladoras (BOE núm. 257, do 26.10.2022).

Mediante o dito Real decreto régulase a transferencia ás Comunidades Autónomas e cidades de Ceuta e Melilla de 110.000.000 de euros con cargo ao programa 17.50.20 45FD 752 752 «Transferencias de capital a empresas privadas. Ayudas a empresas para el impulso de la digitalización, sostenibilidad e innovación en la cadena logística, Mecanismo de





Recuperación y Resiliencia» xestionado pola Secretaría de Estado do Ministerio de Transportes, Mobilidade e Axenda Urbana, previsto nos orzamentos xerais do Estado para o ano 2022, con orixe no Fondo de Recuperación Next Generation EU, ao estar este programa incluído no Compoñente 6 do PRTR (Mobilidade sostible, segura e conectada).

O devandito Real decreto establece un criterio de distribución do orzamento, entre as Comunidades Autónomas e as cidades de Ceuta e Melilla, proporcional a súa poboación co obxectivo de dixitalizar as empresas privadas de transporte de viaxeiros e de mercadorías.

Mediante a Resolución da Secretaría do Estado de Transportes, Mobilidade e Axenda Urbana do Ministerio de Transportes, Mobilidade e Axenda Urbana do 30 de novembro de 2022 concedeuse á Comunidade Autónoma de Galicia unha subvención por importe de 6.257.682€, de conformidade co disposto no Anexo II do dito Real decreto.

Por outra parte, o artigo 7.2 do mesmo establece que se prevé un máximo dun tres por cento do orzamento dispoñible como custos indirectos imputables ás actuacións subvencionadas, que ascende a 187.730,46€.

O Real decreto 902/2022, de 25 de outubro, ten por obxecto regular a concesión directa das axudas ás comunidades autónomas e ás cidades de Ceuta e Melilla e aprobar as bases reguladoras das subvencións reguladas polo mesmo, ás que deberán suxeitarse ás comunidades autónomas beneficiarias ao publicar as súas correspondentes convocatorias das axudas.

Este programa de axudas pretende incrementar a eficiencia das empresas e do sistema de transporte por estrada mediante a dixitalización, a



sustentabilidade, a conectividade, a renovación dos sistemas e a introdución de novas tecnoloxías no sector. Para conseguir a interoperabilidade dos sistemas e procesos dos diferentes actores involucrados no transporte de mercadorías considérase necesario promover, non só a modernización das empresas de transporte, senón tamén dos operadores de transporte e das empresas cargadoras, como membros indispensables da cadea de transporte.

Debido á necesidade de modernizar o sector do transporte, que en España está moi atomizado cun número considerable de pequenas empresas sen a capacidade e coñecemento para mellorar a súa eficiencia mediante a introdución de novas tecnoloxías, e tendo en conta que a tipoloxía de actuación subvencionables non posibilitan unha comparación das axudas entre sí, se require o cumprimento duns requisitos predeterminados de situación de empresa como o seu tamaño, incluíndo únicamente a autónomos e pemes, que sexan titulares dalgunha das autorizacións recollidas no Real decreto e que esté en vigor no momento de presentar a solicitude da axuda.

Así, as empresas do ámbito tecnolóxico e dixital que sexan provedores de algunha das solucións de modernización incluídas no Real decreto poderán solicitar a súa adhesión ao programa na sede electrónica do Ministerio de Transportes, Mobilidade e Axenda Urbana, mediante o procedemento publicado na *web* do Ministerio, no seguinte enlace, de conformidade co establecido no Anexo VI do Real decreto 902/2022, do 25 de outubro:

https://sede.mitma.gob.es/SEDE_ELECTRONICA/LANG_CASTELLANO/OFICINAS_SECTORIALES/GESTION_TRANS_PRTR_CCAA/adhesion-proveedores-





soluciones-modernizacion-programa-ayudas-autonomos-y-pymes-modernizar/

Ao ser admisibles as adhesións realizadas na sede electrónica do Ministerio de Transportes, Mobilidade e Axenda Urbana, non se establece ningún condicionante adicional para as que pretendan ter validez en Galicia e, polo tanto, estímase que a apertura dun procedemento de adhesión complementario podería dar lugar a confusións para os destinatarios últimos, razón pola cal non se considera oportuno abrir un procedemento paralelo de adhesión destes provedores na comunidade autónoma de Galicia.

O prazo para solicitar a adhesión ao Programa estará aberto ata o 30 de xuño de 2024, sen prexuízo de que, unha vez esgotado o crédito atendendo ás solicitudes que xa fosen presentadas e á súa orde de presentación, as novas solicitudes que se presenten seguirán rexistrándose nunha lista de reserva provisional.

O Ministerio de Transportes, Mobilidade e Axenda Urbana publicará tamén na súa *Web* o rexistro de Provedores Adheridos ao programa, coa finalidade de que se poida consultar tanto polas Comunidades Autónomas, como polos destinatarios últimos das axudas. Os Provedores poderán estar dados de alta para unha ou varias das tipoloxías de actuacións subvencionables definidas no Real decreto 902/2022, do 25 de outubro e publicarán a súa oferta de servizos neste rexistro.

Ademais, os Provedores poderán asistir de xeito voluntario aos destinatarios últimos na solicitude e xestión das axudas.



Dado o carácter incentivador das axudas, so se admitirán actuacións iniciadas con posterioridade á data de rexistro da solicitude da axuda. Entenderase como data de inicio das actuacións a data da sinatura do contrato entre o destinatario último e o Proveedor de Solucións de Modernización.

Os destinatarios últimos das axudas dirixirán as solicitudes ás Comunidades Autónomas onde teñan a súa residencia fiscal.

Establécense nove categorías de solucións de modernización subvencionables e os destinatarios últimos poderán elixir ata un máximo de dúas solucións de entre as establecidas como elixibles para o seu tamaño e tipo de actividade.

O prazo máximo para resolver e notificar é de seis meses desde a data de presentación da solicitude. De non notificarse a resolución en prazo entenderase desestimada a solicitude.

Unha vez ditada a resolución de concesión da axuda, o destinatario último recibirá un «cheque moderniza», pola contía correspondente á actuación para a que solicitou a axuda. No suposto de solicitar dúas Solucións de Modernización recibirá dous “cheques moderniza”, un para cada unha das Solucións e pola contía correspondente a cada unha, dado que a contratación se pode realizar con distintos Proveedores.

O destinatario último deberá empregalo para a contratación dalgunha das Solucións de Modernización incluídas no Real decreto, formalizando deste xeito Acordos de Prestación de Solucións de Modernización cos Proveedores de Soluciones de Modernización Adheridos, e cos que formalizase un contrato previo.





Deberán presentar unha/a proposta/s de Acordo de Prestación ante a Dirección Xeral de Mobilidade, que se pronunciará sobre a mesma nun prazo de 10 días hábiles. Transcorrido este prazo sen pronunciarse os Acordos consideraranse válidos.

A continuación, formalizarse un Acordo de Prestación para cada unha das categorías de solucións de modernización subvencionables, dado que os Proveedores poden ser diferentes.

O prazo máximo para a formalización dos Acordos será de tres meses desde a notificación da resolución de concesión. Transcorrido o dito prazo, o destinatario último perderá o dereito ao cobro do importe. Unha vez formalizado este Acordo, procederá a prestación da solución de modernización polo Proveedor. Realizada a prestación, o Proveedor emitirá ao destinatario último unha única factura polo importe total, para cada unha das solucións de modernizacións. A factura reflectirá a redución no importe a abonar polo destinatario último, con respecto á contía da subvención concedida no "cheque moderniza".

O pago da prestación realizarase polo destinatario último, mediante a cesión ao Proveedor do «cheque moderniza» asociado ao Acordo suscrito. Ademais, deberá pagarlle a parte correspondente dos custos non subvencionables.

No suposto de que o "cheque moderniza" supere o custo da actuación realizada, o pago da subvención realizarase polo importe do custo da actuación subvencionable.

Trala prestación da solución de modernización, o Proveedor de Solucións de Modernización, en nome do destinatario último, deberá presentar a



xustificación das accións realizadas (actividade contratada e formalizada no Acordo de Prestacións de Solucións de Modernización) nun prazo máximo de doce meses desde a resolución de concesión da subvención.

A comunidade autónoma dispón dun prazo de seis meses para verificar o cumprimento da execución da actuación e proceder ao pago do “cheque moderniza” aos Provedores.

Así mesmo, tendo en conta o obxecto e finalidade das actuacións subvencionables, o procedemento de concesión das axudas será o de concesión directa ou concorrencia simple. No presente caso, concorren razóns de interese social e económico que xustifican recorrer á excepción prevista no artigo 19.2 en relación co artigo 22 da Lei 9/2007, do 13 de xuño, de subvencións de Galicia. En base aos mesmos, na presente convocatoria excepciónase o criterio xeral de fixar unha orde de prelación entre as solicitudes presentadas que reúnan os requisitos establecidos mediante a súa comparación, e régúlase un procedemento de concesión abreviado no que a proposta de concesión se formulará ao órgano concedente directamente polo órgano instrutor, que unicamente deberá comprobar a concorrencia dos requisitos requiridos polas bases reguladoras para conceder a subvención.

Levarase a cabo un procedemento de análise sistemática e automatizada do risco de conflito de interese ao ser unha convocatoria do Plan de Recuperación, Transformación e Resiliencia (PRTR), en cumprimento do establecido na Disposición adicional centésima décima segunda da Lei 31/2022, do 23 de decembro, de Orzamentos Xerais do Estado para o ano 2023, e que este procedemento estará regulado pola Orde HFP/55/2023, do 24 de xaneiro, relativa á análise sistemática do risco de conflito de interese





nos procedementos que executan o Plan de Recuperación, Transformación e Resiliencia.

En relación co cumprimento da normativa de axudas de Estado, esta axuda configúrase de conformidade co Marco Nacional Temporal de Ucraína, aprobado pola Comisión Europea na súa Decisión S.A.102771 (2022/N) e as súas modificacións. A concesión destas axudas estará sometida polo tanto, aos requisitos e límites establecidos no dito Marco Nacional, sempre que se concedan antes do 31 de decembro de 2023 ou, de selo caso, ata a data á que se prorrogue o devandito Marco Temporal. Estas axudas concederanse a empresas e autónomos afectados pola crise de Ucraína, sempre que o valor nominal total non supere o importe bruto máximo antes de impostos e outras retencións, de 2.000.000 euros, por empresa ou autónomo, cando se realice en forma de subvencións directas, vantaxes fiscais ou de pago, anticipos reembolsables, garantías, préstamos e capital.

As axudas que se concedan a partir da data de finalización da vixencia do referido Marco Nacional de Ucraína, estarán suxeitas ao Regulamento (UE) 1407/2013, da Comisión, do 18 de decembro, relativo á aplicación dos artigos 107 e 108 do Tratado de funcionamento da Unión Europea ás axudas de *minimis*.

O importe total das axudas de *minimis* que poderá concederse a cada un destes destinatarios últimos non poderá exceder a cifra de 200.000 euros durante calquera período de tres exercicios fiscais. No caso de que realicen por conta allea operacións de transporte de mercadorías por estrada, non poderá exceder a cifra de 100.000 euros durante calquera período de tres exercicios fiscais.



Consecuentemente, esta orde de convocatoria axústase á Lei 9/2007, do 13 de xuño, e ao Decreto 11/2009, do 8 de xaneiro, polo que se aproba o Regulamento da Lei 9/2007, do 13 de xuño, de subvencións de Galicia; así como ao disposto na Lei 38/2003, do 17 de novembro, xeral de subvencións, e normas de desenvolvemento.

Na súa virtude, e en uso das facultades que teño atribuídas pola Lei 1/1983, do 22 de febreiro, de normas reguladoras da Xunta e da súa Presidencia; polo Decreto 73/2022, do 25 de maio, polo que se fixa a estrutura orgánica das vicepresidencias e das consellerías da Xunta de Galicia, e polo Decreto 48/2022, do 28 de abril, polo que se modifica o Decreto 26/2019, do 7 de marzo, polo que se establece a estrutura orgánica da Consellería de Infraestruturas e Mobilidade

DISPOÑO

Artigo 1. Obxecto.

O obxecto desta Orde é convocar as subvencións incluídas nos programas de incentivos ligados á modernización de empresas privadas de transporte de viaxeiros prestadoras de servizos de transporte por estrada e de empresas privadas que interveñen no transporte de mercadorías por estrada, no marco do Plan de Recuperación, Transformación e Resiliencia.

Artigo 2. Bases reguladoras

Complexo Administrativo San Caetano
Edificio número 5, planta1ª
15781 Santiago de Compostela
T. 981 544 581
mobilidade.cim@xunta.gal
www.xunta.gal





As bases reguladoras aplicables a estas subvencións establécense no Real decreto 902/2022, do 25 de outubro, polo que se aproba a concesión directa ás comunidades autónomas e ás cidades de Ceuta e Melilla de axudas para a modernización de empresas privadas de transporte de viaxeiros prestadoras de servizos de transporte por estrada e de empresas privadas que interveñen no transporte de mercadorías por estrada, no marco do Plan de Recuperación, Transformación e Resiliencia (BOE núm. 257, do 26 de outubro).

Artigo 3. Marco normativo

En todo o non regulado na presente Orde, será de aplicación o Real decreto 902/2022, do 25 de outubro, que establece a normativa específica aplicable, os requisitos e obrigas dos destinatarios últimos, as contías e requisitos das actuacións, e os procedementos de concesión, así como o disposto na Lei 39/2015, do 1 de outubro, do procedemento administrativo común das Administracións públicas e na Lei 9/2007, de 13 xuño, de subvencións de Galicia; no Decreto 11/2009, do 8 de xaneiro, polo que se aproba o Regulamento da Lei 9/2007, do 13 de xuño, de subvencións de Galicia; no texto refundido da Lei de réxime financeiro e orzamentario de Galicia, aprobado polo Decreto legislativo 1/1999, do 7 de outubro; e demais normativa de aplicación .

Así mesmo, tamén será de aplicación a normativa europea aplicable en materia de axudas de Estado e calquera desenvolvemento normativo que realice o Ministerio de Transportes, Mobilidade e Axenda Urbana ao amparo da habilitación prevista na Disposición adicional primeira do Real decreto 902/2022, do 25 de outubro.



Artigo 4. Financiamento e crédito orzamentario

1. Destínase ao financiamento desta convocatoria un orzamento por importe total de seis millóns douscentos cincuenta e sete mil seiscientos oitenta e dous euros (6.257.682€), con cargo ás anualidades 2023 e 2024.
2. Do importe total, destinaranse 6.069.951,54€ ás subvencións obxecto desta convocatoria, que se concederán con cargo á aplicación orzamentaria 09.02.512A.770.0 dos Orzamentos Xerais da Comunidade Autónoma de Galicia para os exercicios 2023 e 2024.
3. Destinarase a custos indirectos o 3% do importe total, que ascende a 187.730,46€.

Artigo 5. Compatibilidade das axudas

As subvencións obxecto desta convocatoria serán incompatibles con outras subvencións ou axudas que puidesen concederse para a mesma finalidade, procedentes de calquera administracións ou entes públicos ou privados, nacionais ou de organismos internacionais e en especial co Programa Kit Digital, de conformidade co establecido no artigo 21.3 do Real decreto 902/2022, do 25 de outubro.

Artigo 6. Destinatarios últimos das axudas

1. Os artigos 14, 15 e 16 do Real decreto 902/2022, do 25 de outubro, regulan os destinatarios últimos das subvencións convocadas por esta orde, os requisitos para obter esta condición e as súas obrigas.





2. Serán destinatarios últimos das axudas, sempre que teñan a súa residencia fiscal en España, tanto as persoas xurídicas privadas incluídas na definición de peme de acordo co establecido no anexo I do Regulamento (UE) 651/2014 da Comisión, do 17 de xuño de 2014, como as persoas físicas, cando, en ambos casos, cumpran algunha das seguintes condicións:

a) Sexan titulares dalgunha das seguintes autorizacións en vigor na data da solicitude das axudas:

1.º Unha autorización de transporte público de mercadorías habilitante para facer transporte con vehículos ou conxuntos de vehículos de máis de 3,5 tn. de masa máxima, identificada coa clave MDPE.

2.º Unha autorización de transporte público discrecional de viaxeiros en autobús, identificada coa clave VDE.

3.º Unha autorización de transporte público de mercadorías, habilitante para facer transporte con vehículos de ata 3,5 tn de masa máxima, identificada coa clave MDLE.

4.º Unha autorización de operador de transporte habilitante para intermediar na contratación de transportes públicos de mercadorías, identificadas rexistralmente coa clave OT.

b) Na data da solicitude da axuda presten servizo público de transporte urbano en autobús e estiveran exentas da obtención dalgunha das autorizacións incluídas na letra a) do presente apartado.

c) Interveñan no proceso de transporte de mercadorías como cargador/descargador ou expedidor/receptor, tal e como se reflicte na Lei 16/1987, do 30 de xullo, no documento de control e no ADR.



Artigo 7. Actuacións subvencionables

1. Estas axudas outórganse ao abeiro da subvención concedida polo Ministerio de Transportes, Mobilidade e Axenda Urbana, no marco do Mecanismo de Recuperación e Resiliencia.

2. Serán actuacións subvencionables as categorías de Solucións de Modernización que se enumeran no artigo 19 do Real decreto 902/2022, do 25 de outubro:

Categoría 1: Xestión de documentos de control electrónicos (Anexo I, IF325A).

Categoría 2: Sistema de tacógrafo intelixente de segunda xeración (Anexo II, IF325B).

Categoría 3: Integración de documentos de control electrónicos nos sistemas de xestión (Anexo III, IF325C).

Categoría 4: Implantación de sistemas TMS/ERP (Anexo IV, IF325D).

Categoría 5: Implantación de sistemas SAE (Anexo V, IF325E).

Categoría 6: Actualización de sistemas SAE (Anexo VI, IF325F).

Categoría 7: Axudas aos servizos de transporte de viaxeiros (Anexo VII, IF325G).

Categoría 8: Implantación de aplicacións para reclamacións por medios

Electrónicos (Anexo VIII, IF325H).





Categoría 9: Mellora de sistemas de ticketing (Anexo IX, IF325I).

2. Só serán subvencionables as actuacións realizadas con posterioridade á presentación da solicitude de axuda.

3. Entenderase como data de inicio das actuacións a data de sinatura do contrato previo entre o destinatario último da axuda e o Proveedor de Solucións de Modernización, de acordo co artigo 19.3 do Real decreto 902/2022, do 25 de outubro.

4. Non se considerarán subvencionables o Imposto sobre o Valor Engadido (IVE), o Imposto Xeral Indirecto Canario nin o Imposto sobre a Produción, os Servizos e a Importación, que se devindiquen na adopción de solución de modernización, de conformidade co artigo 31.8 da Lei 38/2003, do 17 de novembro, Xeral de Subvencións.

5. Na Categoría 3 "Integración de documentos de control electrónicos nos sistemas de xestión", esta categoría está destinada unicamente á actividade de transporte de mercadorías.

6. Na Categoría 5 "Implantación de sistemas SAE" e na Categoría 6 "Actualización de sistemas SAE", dado que as axudas se establecen por número de vehículos da empresa, a implantación debe realizarse nos seguintes vehículos:

a) Se o destinatario último ten ata tres vehículos, deberá instalar como mínimo os sistemas SAE embarcado nun vehículo.

b) Se o destinatario último ten entre catro e dez vehículos, deberá instalar como mínimo os sistemas SAE embarcados en tres vehículos.



c) Se o destinatario último ten máis de dez vehículos, deberá instalar como mínimo os sistemas SAE embarcados en dez vehículos.

7. Na Categoría 7 "Axuda aos servizos de transporte de viaxeiros", as axudas establécense por número de vehículos, e máis importe polo sistema de conteo, polo que:

a) Se o destinatario último ten ata tres vehículos, deberá instalar como mínimo os sistemas hardware de conteo e os sensores necesarios nun vehículo.

b) Se o destinatario último ten entre catro e dez vehículos, deberá instalar como mínimo os sistemas hardware de conteo e os sensores necesarios en tres vehículos.

c) Se o destinatario último ten máis de dez vehículos, deberá instalar como mínimo os sistemas hardware de conteo e os sensores necesarios en dez vehículos.

Artigo 8. Contía das axudas

1. O Anexo I do Real decreto 902/2022, do 25 de outubro establece o importe das axudas en función do tipo de actividade do destinatario último e do seu tamaño (número de empregados e número de vehículos).

2. Os importes do Anexo I do Real decreto 902/2022 para cada categoría de solucións de modernización son valores máximos. Non se poderán solicitar dous paquetes e empregar o importe dun dos paquetes para incrementar a axuda do outro.





3. En canto ao número de empregados, computarase o persoal medio en situación de alta no réxime xeral da seguridade social no período dos doce meses anteriores á data da solicitude da axuda.

a) Para ou autónomos/as, computan:

1º) O/a autónomo/a empregador/a.

2º) O persoal medio en situación de alta no réxime xeral da seguridade social no período indicado.

3º) Autónomos/as colaboradores/as que declare o autónomo/a.

b) Para as empresas, computan:

1º) O persoal medio en situación de alta no réxime xeral da seguridade social no período indicado.

2º) Autónomos/as socios/as que declare a empresa.

4. En canto ao número de vehículos da empresa, contabilizarase o número de vehículos no momento de presentar a solicitude de axuda.

Artigo 9. Prazo de presentación de solicitudes

O prazo para a presentación de solicitudes de axudas, contarase a partir do día seguinte da publicación desta orde no Diario Oficial de Galicia e estará vixente ata o 30 de xuño de 2024.

Artigo 10. Solicitudes



1. Os destinatarios últimos que teñan a súa residencia fiscal na Comunidade Autónoma de Galicia poderán presentar unha solicitude de subvención para cada unha das solucións de modernización solicitadas, dirixida á Consellería de Infraestruturas e Mobilidade.

Cada destinatario último poderá elixir ata un máximo de dúas solucións de modernización de entre as establecidas como elixibles no Anexo I do Real decreto 902/2022, para o seu tamaño e tipo de actividade.

2. De acordo co disposto no artigo 14.3 da Lei 39/2015, do 1 de outubro, do procedemento administrativo común das administracións públicas, e no artigo 10 da Lei 4/2019, do 17 de xullo, de administración dixital de Galicia, a solicitude e tramitación destes procedementos farase por medios exclusivamente electrónicos.

En consecuencia, para poder ser beneficiario das subvencións deberá presentar unha solicitude axustada ao modelo normalizado que, figuran como Anexos I a IX a esta orde.

Deberán presentar o Anexo correspondente a cada unha das categorías de actuacións para as que solicite a axuda, e que estará dispoñible na sede electrónica da Xunta de Galicia (<https://sede.xunta.gal>).

De conformidade co artigo 68.4 da Lei 39/2015, do 1 de outubro, se algunha das persoas interesadas presenta a súa solicitude presencialmente, requiriráselle para que a emende a través da súa presentación electrónica. Para estes efectos, considerarase como data de presentación da solicitude aquela en que foi realizada a emenda.

Para a presentación das solicitudes poderá empregarse calquera dos mecanismos de identificación e sinatura admitidos pola sede electrónica da





Xunta de Galicia, incluído o sistema de usuario e clave Chave365 (<https://sede.xunta.gal/chave365>).

A presentación da solicitude supón a aceptación das bases reguladoras destas subvencións e das obrigas reguladas nesta orde para ser beneficiarias da axuda, así como a aceptación da subvención de ser persoa beneficiaria dela.

Ao ser válida unha única solicitude por persoa ou entidade, para cada unha das categorías de actuacións, no caso de que algunha persoa presentase unha nova solicitude para a mesma categoría de actuación entenderase que desiste da anterior, salvo que xa estivese resolta. No suposto de presentar unha nova solicitude para unha categoría de actuación diferente, das dúas presentadas con anterioridade, entenderase que desiste da primeira solicitude presentada.

3. Na solicitude de axuda incorporárase a información relativa ao destinatario último da axuda e ao seu representante, no seu caso, así como as declaracións responsables enumeradas no Anexo III do Real decreto 902/2022, do 25 de outubro.

a) Outras subvencións solicitadas ou concedidas: a entidade deberá declarar se solicitou ou se lle concederon outras axudas para a/as actividade/es para a/as que se solicita subvención, con expresión do organismo concedente, ano, importe expresado en euros e disposición reguladora da axuda solicitada ou concedida. En caso contrario, a entidade deberá declarar que non se solicitou nin se concedeu ningunha outra axuda para a/as actividade/es para a/as que se solicita subvención. En especial, declarará se solicitou ou lle foi concedida axudas ao abeiro do *Programa Kit Digital* regulado na





XUNTA
DE GALICIA



Financiado por
la Unión Europea
NextGenerationEU



Plan de Recuperación,
Transformación y Resiliencia

Orde ETD/1498/2021, do 29 de decembro, pola que se aproban as bases reguladoras da concesión de axudas para a dixitalización de pequenas empresas, microempresas e persoas en situación de autoemprego, no marco da Axenda España Dixital 2025, o Plan de Dixitalización PYMES 2021-2025 e o Plan de Recuperación, Transformación e Resiliencia de España- Financiado pola Unión Europea- Next Generation Eu, de acordo co establecido no artigo 21 do Real decreto 902/2022, do 25 de outubro.

Así mesmo, o destinatario último tamén declarará se está suxeito ao Regulamento (UE) n.º 1407/2013 da Comisión, do 18 de decembro de 2013, relativo á aplicación dos artigos 107 e 108 do Tratado de Funcionamento da Unión Europea ás axudas de *mínimis* e as axudas percibidas durante os dous últimos exercicios fiscais e o exercicio fiscal en curso.

En relación co Marco Nacional Temporal de Ucraína, aprobado pola Comisión Europea na súa Decisión S.A.102771 (2022/N), o destinatario último, declarará responsablemente:

- Que se viu afectado economicamente polas consecuencias derivadas da invasión de Ucraína, polas sancións impostas pola comunidade internacional contra Rusia e polas contramedidas adoptadas por ésta.
- Outras axudas percibidas en aplicación deste Marco Nacional Temporal ou do Marco Temporal Europeo Ucraína.
- Non foi sancionado pola Unión Europea como consecuencia da invasión de Ucraína.





b) Veracidade dos datos, inexistencia de causa que implique prohibición para ser beneficiario, estar ao corrente no pago das obrigas por reintegros de subvencións e, ao mesmo tempo, estar ao corrente no pago das obrigas tributarias estatais e autonómicas e fronte á Seguridade Social, e non ter pendente de pago ningunha outra débeda coa Administración da Comunidade Autónoma de Galicia.

c) Cumprimento de requisitos establecidos na normativa vixente e da dispoñibilidade da documentación que así o acredite no caso de que sexa requirida pola Administración, así como que a/as actuación/s para a/as que solicita subvención desenvólvense de maneira real e efectiva na Comunidade Autónoma de Galicia.

d) Que a empresa non se atopa en situación de crise, conforme á definición que para estes efectos se realiza no Regulamento UE 651/2014, do 17 de xuño de 2014.

e) Que a empresa non se atopa suxeita a unha orde de recuperación pendente sobre calquera axuda ou subvención que lles fose outorgada con anterioridade, ben por declararse axuda ilegal e incompatible co mercado interior, ben por calquera tipo de incumprimento das obrigas que lle viñesen atribuídas na concesión.

f) Declaración pola cal se compromete a conceder os dereitos e accesos necesarios para garantir que a Comisión Europea, a OLAF, o Tribunal de Contas Europeo, a Fiscalía Europea e as autoridades nacionais competentes exerzan as súas competencias.

g) A aceptación da cesión de datos entre as administracións Públicas implicadas para dar cumprimento ao previsto na normativa



europea que é de aplicación e de conformidade coa Lei Orgánica 3/2018, do 5 de decembro, de Protección de Datos Persoais e garante dos dereitos dixitais.

h) Que a persoa física ou entidade solicitante asumirá a aplicación de medidas antifraude eficaces e proporcionadas no seu ámbito de xestión, así como a obriga de comunicar ao órgano xestor os casos de sospeitas de fraude.

i) Coñecemento das obrigas derivadas desta orde e demais normativa aplicable.

j) Declaración responsable relativa ao cumprimento dos principios transversais establecidos no PRTR e que puidera afectar ao ámbito obxecto de xestión.

Artigo 11. Documentación complementaria

1. Xunto con cada unha das solicitudes, os destinatarios últimos deberán presentar, como documentación complementaria común a todos os procedementos de subvencións regulados nesta orde, a documentación relacionada no Anexo III do Real decreto 902/2022.

2. O destinatario último deberá presentar Declaración responsable de ausencia de conflito de interese en relación coa execución das Actividades para as que solicita subvención, no marco do Plan de Recuperación, Transformación e Resiliencia, segundo o modelo que se recolle no Anexo X desta Orde.

3. O destinatario último e o Proveedor de Solucións garantirán que todas as actuacións que se leven a cabo en cumprimento do presente programa





respetan o principio de «non causar prexuízo significativo» (principio «Do not significant harm-DNSH»), no sentido establecido no punto 6) do artigo 2 do Regulamento (UE) 2021/241 do Parlamento europeo e do Consello, do 12 de febreiro de 2021, polo que se establece o mecanismo de recuperación e resiliencia. Para iso deberán presentar asinada electronicamente a declaración responsable, colgado no seguinte enderezo electrónico do Ministerio de Transición Ecolóxica e Reto Demográfico: https://www.miteco.gob.es/es/ministerio/recuperacion-transformacion-resiliencia/transicion-verde/cuestionariodnshmitecov20_tcm30-529213.pdf

No Anexo XIV desta Orde publícase este modelo, pero terán que presentar, en todo caso, o modelo que esté vixente na web do MITECO no momento de presentar a súa solicitude.

4. Certificado de alta no Censo de empresarios, profesionais, retedores ou certificado da situación censual, expedido pola Axencia Estatal da Administración Tributaria.

5. Copia da documentación que acredite a autorización da que é titular o destinatario último da axuda, salvo no caso de cargador/ descargador, expedidor/receptor ou de prestación do servizo público de transporte urbano en autobús.

6. Asemade, os destinatarios últimos deberán presentar, como documentación complementaria específica, os documentos sinalados a continuación:

a) Para as solicitudes dos Anexos I (IF325A), Anexo III (IF325C) e Anexo IV (IF325D):



1. Certificado do persoal medio de traballadores en situación de alta, expedido pola Tesouraría Xeral da Seguridade Social, por cada código de conta de cotización que teña dado de alta, nos últimos 12 meses anteriores á presentación da solicitude de axuda.
 2. Documentación acreditativa da condición de autónomo colaborador e autónomo societario do solicitante, no seu caso.
- b) Para as solicitudes dos Anexos II (IF325B), Anexo V (IF325E), Anexo VI (IF325F), Anexo VII (IF325G), Anexo VIII (IF325H) e Anexo IX (IF325I), copia da documentación que acredite o número de vehículos dos que é titular o destinatario último da axuda.
- c) Para as solicitudes dos Anexos V (IF325E), VI (IF325F), VII (IF325G) e IX (IF325I), de ser o caso, para acreditar que o destinatario último presta servizo público de transporte urbano en autobús e estivera exento da obtención dalgunha das autorización incluídas na letra a) do artigo 14.1: certificación expedida polo órgano competente da correspondente Entidade Local que acredite a prestación do servizo público de transporte urbano na data de solicitude da axuda.
- d) Outra documentación adicional que o interesado considere conveniente.
7. De conformidade co artigo 28.3 da Lei 39/2015, do 1 de outubro, do procedemento administrativo común, non será necesario achegar os documentos que xa foran presentados anteriormente pola persoa interesada a calquera Administración. Neste caso, a persoa interesada deberá indicar en que momento e ante que órgano administrativo presentou os ditos documentos, que serán recabados electronicamente a través das redes corporativas ou mediante consulta ás plataformas de intermediación de datos ou outros sistemas electrónicos habilitados ao





efecto, agás que conste no procedemento a oposición expresa da persoa interesada.

De forma excepcional, se non se puideran obter os citados documentos, poderá solicitarse novamente á persoa interesada a súa achega.

8. A documentación complementaria deberá presentarse electronicamente.

Se algunha das persoas interesadas presenta a documentación complementaria presencialmente, requiriráselle para que a emende a través da súa presentación electrónica. Para estes efectos, considerarase como data de presentación aquela na que fose realizada a emenda.

As persoas interesadas responsabilizaranse da veracidade dos documentos que presenten. Excepcionalmente, cando a relevancia do documento no procedemento o exixa ou existan dúbidas derivadas da calidade da copia, a Administración poderá solicitar de maneira motivada o cotexo das copias achegadas pola persoa interesada, para o que poderán requirir a exhibición do documento ou da información orixinal.

9. Sempre que se realice a presentación de documentos separadamente da solicitude deberase indicar o código e o órgano responsable do procedemento, o número de rexistro de entrada da solicitude e o número de expediente se se dispón del.

10. No caso de que algún dos documentos a presentar de forma electrónica superase os tamaños máximos establecidos ou tivera un formato non admitido pola sede electrónica da Xunta de Galicia, permitirase a presentación deste de forma presencial dentro dos prazos previstos e na forma indicada no número anterior. A información actualizada sobre o



tamaño máximo e os formatos admitidos pode consultarse na sede electrónica da Xunta de Galicia.

Artigo 12. Comprobación de datos

1. Para a tramitación destes procedementos consultarase automaticamente os datos incluídos nos seguintes documentos en poder da Administración actuante ou elaborados polas administracións públicas, agás que a persoa interesada se opoña á súa consulta:

- a) DNI ou NIE da persoa solicitante ou, no seu caso, do representante.
- b) DNI ou NIE da persoa Provedora solicitante do pagamento ou, no seu caso, do representante.
- c) NIF da entidade solicitante, ou no seu caso, da entidade representante.
- d) NIF da entidade Provedora solicitante do pagamento ou, no seu caso, do representante.
- e) Certificado sobre cumprimento de obrigas tributarias coa Axencia Estatal da Administración Tributaria.
- f) Certificado sobre cumprimento de obrigas coa Seguridade Social.
- g) Certificado sobre cumprimento de obrigas tributarias coa Administración pública da Comunidade Autónoma de Galicia.
- h) Datos de residencia con data de a última variación do padrón.
- i) Certificado de alta no imposto de Actividades Económicas.





j) Consulta de datos de vehículos coa Dirección Xeral de Tráfico (DXT).

k) Consulta de datos de propietarios coas Dirección Xeral de Tráfico (DXT).

2. No caso de que as persoas interesadas se opoñan a esta consulta, deberán indicalo no recadro habilitado no formulario correspondente e achegar os documentos.

Cando así o esixa a normativa aplicable solicitarase o consentimento expreso da persoa interesada para realizar a consulta.

3. Excepcionalmente, no caso de que algunha circunstancia imposibilite a obtención dos citados datos, poderase solicitar ás persoas interesadas a presentación dos documentos correspondentes.

Artigo 13. Trámites administrativos posteriores á presentación de solicitudes

Todos os trámites administrativos que as persoas interesadas deban realizar tras a presentación da solicitude deberán ser efectuados electronicamente accedendo á Carpeta cidadá da persoa interesada dispoñible na sede electrónica da Xunta de Galicia (<http://sede.xunta.gal>)

Artigo 14. Instrución dos procedementos de concesión das axudas

1. O órgano competente para a ordenación e instrución dos procedementos é a Subdirección Xeral de Ordenación do Transporte, que realizará de oficio cantas actuacións sexan necesarias para a determinación, coñecemento e



comprobación dos datos en virtude dos cales deba formularse a proposta de resolución da concesión das subvencións.

2. Recibidas a solicitudes de axuda con reserva de fondos, estas serán tramitadas por rigorosa orde de presentación por parte do órgano instructor, quen as remitirá á unidade administrativa encargada de comprobar se a solicitude ou documentación presentada reúne os requisitos esixidos nesta orde e, no caso de que se observe algún defecto ou sexa incompleta a documentación, de conformidade co disposto no artigo 68 da Lei 39/2015, do 1 de outubro, requirirán á persoa interesada para que nun prazo de 10 días hábiles emende a falla ou presente os documentos preceptivos, de conformidade co previsto no artigo 20.5 da Lei 9/2007, do 13 de xuño, de subvencións de Galicia, coa advertencia de que, se así non o fixese, considerárase a persoa ou entidade interesada desistida da súa petición, tras a resolución, que deberá ser ditada nos termos previstos no artigo 21 da Lei 39/2015, do 1 de outubro.

3. O órgano instructor verificará que as solicitudes cumpren debidamente os requisitos esixidos e que os expedientes estean completos, e emitirá a proposta que proceda en cada caso, que será previa á resolución que corresponda.

Artigo 15. Concesión de subvencións

1. O órgano competente para resolver a concesión das subvencións será a persoa titular da Dirección Xeral de Mobilidade.





2. A resolución de concesión destas axudas realizarase en réxime de concorrència non competitiva, segundo a excepción contemplada no artigo 19.2 da Lei 9/2007, do 13 de xuño, de subvencións de Galicia.

3. A persoa titular da Dirección Xeral de Mobilidade, á vista da proposta realizada polo órgano instrutor, ditará a correspondente resolución motivada por rigorosa orde de presentación ata o esgotamento dos fondos asignados á Comunidade Autónoma de Galicia, e expresará, polo menos, a identificación do beneficiario, a actividade ou actividades que se subvenciona, así como a contía da subvención concedida ou, no seu caso, a causa de inadmisión ou denegación que proceda.

4. Considerarase esgotado o orzamento cando se efectúe o rexistro da última solicitude de axuda que totalice o importe asignado á Comunidade Autónoma de Galicia. En caso de esgotamento do orzamento asignado, e sempre que non expirase a vixencia dos programas, poderán seguir rexistrándose solicitudes nunha lista de reserva provisional, que serán atendidas por rigorosa orde de entrada, supeditadas a que se produzan desestimacións ou renuncias das solicitudes de axuda previas que puidesen liberar orzamento ou ben se incorpore novo orzamento á convocatoria.

En ningún caso, a inclusión dunha solicitude na lista de reserva provisional xerará dereito algún para a persoa solicitante, ata que non se realicen sucesivas propostas de resolución conforme ao sinalado no artigo anterior.

5. O prazo máximo para resolver e notificar a resolución ao interesado será de seis (6) meses, que se contará a partir do seguinte ao da presentación da solicitude. Se transcorre o prazo máximo para resolver sen que recaia resolución expresa, os interesados poderán entender desestimadas as súas solicitudes por silencio administrativo.



6. Non se ditarán resolucións de concesión posteriores ao 31 de decembro de 2024.

7. A dita resolución poñerá fin á vía administrativa, e contra a mesma poderase interpoñer, potestativamente, recurso de reposición ante este mesmo órgano no prazo dun mes tal e como se establece nos artigos 123 e 124 da Lei 39/2015, do 1 de outubro, ou, directamente, recurso contencioso-administrativo ante a Sala do contencioso-administrativo do Tribunal Superior de Xustiza de Galicia, no prazo de dous meses, tal e como establecen os artigos 10, 14.1 e 46 da Lei 29/1998, do 13 de xullo, Reguladora da Xurisdición Contencioso Administrativa, ambos os prazos a contar desde o día seguinte ao da notificación da resolución de concesión de subvencións.

Artigo 16. Acordos de Prestación de Solucións de Modernización

1. Unha vez ditada a resolución de concesión da axuda e determinado o importe do «cheque moderniza», para cada unha das Solucións de Modernización solicitadas e pola contía correspondente ás actuacións respectivas, o destinatario último deberá empregalo para a contratación dalguna das Solucións de Modernización incluídas no Real decreto. Deberá formalizar deste xeito Acordos de Prestación de Solucións de Modernización cos Provedores de Soluciones de Modernización Adheridos.

2. Previamente o destinatario último e o Proveedor de Solucións deberán ter formalizado un contrato. Con posterioridade, asinarán electrónicamente a proposta de Acordo de Prestación de Solucións de Modernizarán. O contrato previo e a proposta de acordo de Prestación de Solucións de Modernización deberán asinarse co mesmo Proveedor de Solucións de





Modernización, en caso contrario, a Proposta de Acordo non se considerará válida.

Deberán presentar unha proposta de Acordo para cada unha das categorías de solucións de modernización para as que solicita a axuda, seguindo o modelo recollido no Anexo XIII desta Orde, nas dúas versións lingüísticas, en galego e en castelán, de conformidade co disposto no artigo 24.5 do Real decreto 902/2022, do 25 de outubro.

3. O destinatario último porá a disposición do órgano concedente a/s proposta/s do/s Acordo/s de Prestación de Solucións de Modernización para comprobar a súa conformidade co Real decreto 902/2022, coa Orde de convocatoria e coa resolución de concesión, que terá 10 días hábiles para pronunciarse sobre a/s proposta/s de Acordo/s subscrito/s. Transcorrido este período de tempo sen que se pronunciara, o Acordo considerárase válido.

Os Acordos serán válidos e producirán efectos unha vez que o órgano concedente se pronuncie sobre o mesmo ou ben tralo transcurso dos 10 días hábiles.

Non se aceptarán propostas de modificación dos Acordos.

4. O Ministerio de Transportes; Mobilidade e Axenda Urbana publica o rexistro de Provedores de Solucións de Modernización Adheridos no seguinte enlace:

<https://www.mitma.gob.es/ministerio/proyectos-singulares/prtr/listado-proveedores-prtr>



5. O prazo máximo para a formalización dos Acordos será de tres meses desde a notificación da resolución de concesión. Transcorrido o dito prazo, o destinatario último perderá o dereito ao cobro do importe.

Unha vez formalizado este Acordo, procederá a prestación da solución de modernización polo Proveedor. Realizada a prestación, o Proveedor emitirá ao destinatario último unha única factura, para cada unha das solucións de modernización, e polo importe total. A factura reflectirá a redución no importe a abonar polo destinatario último, con respecto á contía da subvención concedida no correspondente «cheque moderniza».

6. A entrega ao destinatario último do «cheque moderniza» realizarase unha vez comprobado o cumprimento íntegro das condicións e requisitos establecidos e da documentación achegada.

Artigo 17. Notificacións

1. As notificacións de resolucións e actos administrativos practicaranse só por medios electrónicos, nos termos previstos na normativa reguladora do procedemento administrativo común.

2. De conformidade co artigo 45.2 da Lei 4/2019, do 17 de xullo, de administración dixital de Galicia, as notificacións electrónicas practicaranse mediante a comparecencia na sede electrónica da Xunta de Galicia e a través do Sistema de notificación electrónica de Galicia- Notifica.gal. Este sistema remitirá ás persoas interesadas avisos da posta a disposición das notificacións á conta de correo e/ou teléfono móbil que consten na solicitude. Estes avisos non terán, en ningún caso, efectos de notificación practicada e a súa falta non impedirá que a notificación sexa considerada plenamente válida.





3. De conformidade co artigo 47 da Lei 4/2019, do 17 de xullo, de administración dixital de Galicia, as persoas interesadas deberán crear e manter a súa dirección electrónica habilitada única a través do Sistema de notificación electrónica de Galicia- Notifica.gal, para todos os procedementos administrativos tramitados pola Administración xeral e as entidades instrumentais do sector público autonómico. En todo caso, a Administración xeral e as entidades do sector público autonómico de Galicia poderá de oficio crear a indicada dirección, para os efectos de asegurar que as persoas interesadas cumpran a súa obriga de relacionarse por medios electrónicos.

Para utilizar os servizos de Notifica.gal deberá dispoñer dun usuario e clave no servizo Chave365 ou dun certificado de persoa física ou xurídica asociado ao NIF da persoa destinataria e comprobar que o seu navegador e sistema operativo cumpren os requisitos técnicos.

4. As notificacións entenderanse practicadas no momento en que se produza o acceso ao seu contido, e rexeitadas cando transcorresen dez (10) días naturais desde a posta ao disposición da notificación sen que se acceda ao seu contido.

5. Se o envío da notificación electrónica non é posible por problemas técnicos practicarase a notificación complementaria polos medios previstos na normativa reguladora do procedemento administrativo común.

Artigo 18. Réxime de recursos



As resolucións ditadas ao amparo desta orde, así como a desestimación presunta de solicitudes, poñerán fin á vía administrativa e contra elas poderán interpoñerse os seguintes recursos, sen prexuízo de que as persoas interesadas pidan exercer calquera outro que consideren procedente:

- a) Recurso potestativo de reposición ante o mesmo órgano que ditou a resolución, no prazo dun mes contado a partir do día seguinte ao da notificación da resolución, se esta fóra expresa, ou en calquera momento para partir do día seguinte a aquel en que venza o prazo de seis meses para resolver previsto no artigo 15.4 desta orde.
- b) Recurso contencioso-administrativo ante a Sala do contencioso-administrativo do Tribunal Superior de Xustiza de Galicia, no prazo de dous meses contados desde o día seguinte ao da notificación da resolución, se esta fóra expresa, ou de seis meses contados a partir do seguinte a aquel en que se produza o acto presunto.

Artigo 19. Aceptación e renuncia

1. Notificada a resolución de concesión, o destinatario último poderá comunicar no prazo de dez días (10) hábiles a súa renuncia expresa, total ou parcial, á mesma no caso de estimalo oportuno, segundo o modelo que se recolle no Anexo XI.

No caso de non comunicar a dita renuncia no prazo indicado, entenderase tacitamente aceptada, comprometéndose a executar a totalidade da acción subvencionada nas condicións establecidas na presente convocatoria. No caso de que transcorrido o prazo establecido para a súa execución, non a





executara totalmente declarárase a perda do dereito á axuda e non percibirá o pagamento da mesma. Non se realizarán pagamentos parciais.

2. A renuncia á subvención poderase formular por calquera medio que permita a súa constancia, de acordo co establecido no artigo 94 da Lei 39/2015, do 1 de outubro.

3. Os importes que, no seu caso, resultasen sobrantes por causa de renuncia poderán destinarse ao outorgamento de máis subvencións segundo o determinado na cláusula décimo segunda.

Artigo 20. Modificación da resolución

1. Toda alteración das condicións tidas en conta para a concesión da axuda e, en todo caso, a obtención concorrente de subvencións ou axudas outorgadas por outras administracións ou entes públicos ou privados poderá dar lugar á modificación da resolución de concesión.

As persoas beneficiarias están obrigadas a comunicarlle á Dirección Xeral de Mobilidade calquera circunstancia ou eventualidade que poida afectar substancialmente o destino ou a correcta aplicación da axuda outorgada.

O acto polo que se acorde ou se denegue a modificación da resolución será ditado pola persoa titular da Consellería de Infraestruturas e Mobilidade, tras a instrución do correspondente expediente, no cal se lle dará audiencia á persoa beneficiaria.

2. Poderase acordar a modificación da resolución a instancia do beneficiario, debendo cumprirse os requisitos previstos no artigo 35 do Decreto 11/2009, do 8 de xaneiro, polo que se aproba o Regulamento da Lei 9/2007, do 13 de xuño, de subvencións de Galicia.



3. A modificación debe solicitarse cunha antelación mínima dun mes á data de finalización do prazo de realización da actuación subvencionable.

Artigo 21. Xustificación

1. De acordo co disposto no artigo 23 do Real Decreto 902/2022, do 25 de outubro, trala prestación da solución de modernización, o Proveedor da Solución de Modernización Adherido, en nome do destinatario último, deberá presentar no prazo máximo de doce meses contados desde a data da notificación da resolución de concesión, a documentación específica requirida para xustificar a actuación realizada establecida no Anexo III do Real Decreto 902/2022.

Ademais, deberá presentar a seguinte documentación:

Conta xustificativa simplificada do pagamento, de conformidade co Anexo III do Real decreto 902/2022, achegando os xustificantes de gasto conforme ao previsto no artigo 30 e seguintes da Lei 38/2003, do 17 de novembro e no título II do seu Regulamento de desenvolvemento, que conterá unha memoria e que incluírá a seguinte documentación:

- a) Detalle técnico e funcional das solucións instaladas e prestadas e os seus custos de conformidade co Acordo de Prestación das Solucións de Modernización.
- b) Acreditación do cumprimento da actividade subvencionada, segundo os requisitos que se establecen no anexo I do Real Decreto 902/2022.





c) A factura emitida polo Proveedor de Solucións de Modernización Adherido e a documentación acreditativa do abono da mesma.

d) Conformidade expresa do destinatario último das solucións instaladas e prestadas.

e) Probas pertinentes acerca do cumprimento das obrigas de publicidade que se recollen no artigo 28 do Real Decreto 902/2022.

2. En caso de ampliación excepcional do prazo de xustificación, todas as actuacións deberán estar xustificadas antes do 30 de abril de 2026.

3. Para ese efecto, deberá presentar a solicitude de pagamento da/s actuación/s (Anexo XII, IF325J) xunto coa documentación xustificativa esixida. A documentación que se achegue para xustificar a execución da actuación debe ser coherente coa información achegada no formulario de solicitude da axuda. A solicitude, xunto coa documentación xustificativa, presentarse na forma establecida nos artigos 10 e 11 desta norma.

Artigo 22. Transparencia e bo goberno

1. Deberá darse cumprimento ás obrigas de transparencia contidas no artigo 17 da Lei 1/2016, do 18 de xaneiro, de transparencia e bo goberno, e no artigo 15 da Lei 9/2007, do 13 de xuño, de subvencións de Galicia.

2. En virtude do disposto no artigo 4 da Lei 1/2016, do 18 de xaneiro, de transparencia e bo goberno, as persoas físicas e xurídicas beneficiarias de subvencións están obrigadas a subministrar á Administración, ao organismo ou á entidade das previstas no artigo 3.1 da Lei 1/2016, do 18 de xaneiro, á que se atopen vinculadas, previo requirimento, toda a



información necesaria para o cumprimento por aquela das obrigas previstas no título I da citada lei.

Artigo 23. Publicidade

1. A Consellería de Infraestruturas e Mobilidade publicará as subvencións concedidas ao amparo desta convocatoria e as súas bases reguladoras na súa páxina web oficial (<https://infraestruturasemobilidade.xunta.gal/recursos/axudas-subvencions>) e no Diario Oficial de Galicia expresando a relación dos beneficiarios e o importe das axudas concedidas. Incluirá igualmente, as referidas axudas e as sancións que, como consecuencia delas, puidesen impoñerse nos correspondentes rexistros públicos, polo que a presentación da solicitude levará implícita a autorización para o tratamento necesario dos datos dos beneficiarios e a referida publicidade. A publicidade no Diario Oficial de Galicia realizarase no prazo máximo de tres meses contados desde a data de resolución das concesións, con todo, cando os importes das subvencións concedidas, individualmente consideradas, sexan de contía inferior a 3.000 euros, non será necesaria a publicación no Diario Oficial de Galicia, que será substituída pola publicación das subvencións concedidas na páxina web da consellería.

2. En cumprimento do artigo 20 da Lei 38/2003, do 17 de novembro, xeral de subvencións, o texto da convocatoria e a información requirida no ordinal oitavo do devandito artigo será comunicado á Base de datos nacional de subvencións (BDNS).

3. Sen prexuízo do anterior, deberán respetarse as normas de publicidade recollidas no artigo 28 do Real Decreto 902/2022, do 25 de outubro.





Artigo 24. Réxime sancionador.

O réxime de infraccións e sancións administrativas aplicables será o establecido no título IV da Lei 9/2007, do 13 de xuño, e no título VI do Decreto 11/2009, do 8 de xaneiro.

Artigo 25. Información ás persoas interesadas

Sobre estes procedementos administrativo poderase obter documentación normalizada ou información adicional na Dirección Xeral de Mobilidade, a través dos seguintes medios:

- a) Páxina *web* oficial da Consellería de Infraestruturas e Mobilidade, no epígrafe de Mobilidade.
- b) O teléfono 981 544588 da devandita dirección xeral.
- c) A dirección electrónica: axudasmodernizacion.mobilidade@xunta.gal.
- d) Guía de procedementos e servizos da Xunta de Galicia <https://sede.xunta.gal/guia-de-procedementos-e-servizos>.

Disposición adicional primeira. Delegación de competencias

Apróbase a delegación de competencias da persoa titular da Consellería de Infraestruturas e Mobilidade na persoa titular da Dirección Xeral de Mobilidade, para resolver a concesión ou denegación das axudas e subvencións previstas nesta orde, así como para autorizar, dispoñer, recoñecer a obriga e propoñer os correspondentes pagos, e para resolver



os procedementos de reintegro das subvencións indebidamente percibidas polas persoas beneficiarias, respecto das resolucións de concesión de que derivan, ditadas por delegación da persoa titular da consellería.

Así mesmo delégase na persoa titular da Secretaría Xeral Técnica da consellería o exercicio da competencia para resolver os recursos de reposición que se interpoñan contra todas as resolucións que diten por delegación no ámbito de aplicación da presente Orde de axudas.

Disposición final primeira. Habilitación para o desenvolvemento da orde

Autorízase á persoa titular da Dirección Xeral de Mobilidade para ditar as instrucións e os actos que sexan necesarios para a execución desta orde.

Disposición final segunda. Entrada en vigor

Esta orde entrará en vigor o día seguinte ao da súa publicación no Diario Oficial de Galicia.

Conselleira de Infraestruturas e Mobilidade

Ethel María Vázquez Mourelle (*documento asinado dixitalmente*)

